

臣及內官萬歲榮餉之賜黑麻布白苧布各六匹 上使人餞于西郊 上王亦遣人餞之○臺諫交章請置朴蔓任純禮等於極刑 不允○臺諫請移 宗廟於松都 上曰此事非父王之議當與議政府議而後定○減興天寺田及奴婢○辛丑日本國使十二人來獻土物○壬寅太白晝見二日○癸卯夜艮巽方有赤氣兌方有白氣○王得名至闕告辭設宴以慰得名告于 上曰 帝命臣等直歸 王城推之然逃軍之散在北方者却至 王城而又北還難矣宜盡推刷直送平壤我先歸平壤點送又曰 殿下嘗執林八刺失里等先送 殿下敬 朝廷之意至矣 帝豈能知之吾等入歸實以奏聞願殿下推刷逃軍無遺 上曰此予意也初聞人將相食憫而收納散置而養之今聞 聖天子即位皆令還送願大人善為聞奏得名拜手而去○下黃似蘭於巡衛府○甲辰坎方有白氣竟夜○命議政府餞王得名于迎賓館以齋戒也○以李貴齡為判恭安府事咸傳霖藝文館提學○遣判恭安府事李貴齡